

01,02 - 02-9

11-05-2011



**BOSNA I HERCEGOVINA  
VIJEĆE MINISTARA  
Generalno tajništvo**

**BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO**

PRIMLJENO: 11.05.2011			
Organizacioni broj	Klasifikacioni oznaka	Redni broj	Broj priloga
01,02	-02-9	6/11	3

Broj: 05-02-3340/10  
Sarajevo, 10.5.2011. godine

**PARLAMENTARNA SKUPŠTINA BiH**  
- Zastupnički dom -  
- Dom naroda -

**SARAJEVO**

**PREDMET:** Prijedlog zakona o izmjenama i dopunama Zakona  
o Javnom radiotelevizijskom sustavu Bosne i Hercegovine

Vijeće ministara Bosne i Hercegovine, na 148. sjednici održanoj 14.4.2011. godine, utvrdilo je Prijedlog zakona o izmjenama i dopunama Zakona o Javnom radiotelevizijskom sustavu Bosne i Hercegovine, te zaključilo da se isti uputi Parlamentarnoj skupštini Bosne i Hercegovine uz prijedlog da se razmatra po temeljnom zakonodavnom postupku.

U svezi sa navedenim, u pravitku dostavljamo Prijedlog zakona o izmjenama i dopunama Zakona o Javnom radiotelevizijskom sustavu Bosne i Hercegovine, na bosanskom, hrvatskom i srpskom jeziku. Istodobno dostavljamo Pregled članaka Zakona o Javnom radiotelevizijskom sustavu Bosne i Hercegovine koji se mijenjaju ili dopunjavaju, kao i elektronsku verziju Prijedloga zakona.

S poštovanjem,

**GENERALNI TAJNIK**  
Zvonimir Kutleša




**PRIJEDLOG ZAKONA  
O IZMJENAMA I DOPUNAMA ZAKONA O JAVNOM  
RADIO-TELEVIZIJSKOM SISTEMU BOSNE I HERCEGOVINE**

**Sarajevo, april 2011. godine**

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine, na \_\_\_ sjednici Predstavničkog doma, održanoj \_\_\_\_\_ 2011. godine i na \_\_\_ sjednici Doma naroda, održanoj \_\_\_\_\_ 2011. godine, usvojila je

**ZAKON  
O IZMJENAMA I DOPUNAMA ZAKONA O JAVNOM  
RADIOTELEVIZIJSKOM SISTEMU BOSNE I HERCEGOVINE**

**Član 1.**

U Zakonu o javnom radiotelevizijskom sistemu Bosne i Hercegovine („Službeni glasnik BiH“, br. 78/05, 35/09 i 32/10) u članu 9. stav (1) riječi: „po cijenama koje utvrdi Regulatorna agencija“ brišu se.

**Član 2.**

U članu 10. stav (1) riječi: „Javni RTV servisi neće početi sa radom, prije nego što im Regulatorna agencija izda dozvolu“ brišu se.

**Član 3.**

- (1) U članu 15. stav (1) tačka n) briše se.
- (2) Dosadašnja tačka nj) postaje tačka n).

**Član 4.**

U članu 17. stav (1) mijenja se i glasi:  
„(1) Svako domaćinstvo, pravno lice, poslovne jedinice pravnog lica koje posluju izvan njegovog sjedišta, samostalne radnje, odnosno organizirani subjekti koji obavljaju djelatnost radi stjecanja dobiti na teritoriji Bosne i Hercegovine, koji posjeduju radio ili televizijski prijemnik dužni su da plaćaju mjesečnu taksu za posjedovanje tog prijemnika (u daljem tekstu: RTV taksa) pod uvjetima određenim ovim zakonom.“

**Član 5.**

Član 17a. se briše.

## Član 6.

(1) U članu 18. stav (4) mijenja se i glasi:

„(4) BHRT vrši naplatu RTV takse na području Brčko Distrikta BiH, RTFBiH na području Federacije Bosne i Hercegovine i RTRS na području Republike Srpske. U cilju racionalizacije troškova službe naplate BHRT može povjeriti naplatu RTV takse entitetskim javnim servisima. Tako naplaćena RTV taksa raspoređuje se u skladu s članom 23. ovog zakona“.

(2) Iza stava (5) dodaje se novi stav (6) koji glasi:

„(6) Vijeće ministara BiH će u saradnji sa Odborom Sistema podzakonskim aktom definirati uvjete i proceduru subvencioniranja plaćanja RTV takse kao i izvore subvencioniranja, i to u roku od godinu dana od stupanja na snagu ovog zakona.“

## Član 7.

(1) U članu 19. st. (1) i (2) mijenjaju se i glase :

„(1) Smatra se da jedno lice u svakom domaćinstvu, svako registrirano pravno lice, poslovne jedinice pravnog lica koje posluju izvan njegovog sjedišta, samostalne radnje, organizirani subjekti koji obavljaju djelatnost radi stjecanja dobiti u Bosni i Hercegovini imaju radio ili televizijski prijemnik.

(2) Pretpostavka iz stava (1) ovog člana može se osporiti pisanom izjavom nosioca domaćinstva, odnosno lica ovlaštenog za zastupanje, prilikom prijema mjesečnih računa za naplatu RTV takse.,,

(2) Iza stava (3) dodaje se novi stav (4) koji glasi:

„(4) Ako ovlašteni predstavnik javnih RTV-servisa utvrdi da pretplatnik koji je po pisanoj izjavi prijetodno bio oslobođen plaćanja RTV takse, a nije u međuvremenu po zakonom propisanoj proceduri prijavio nabavku novog radijskog ili televizijskog aparata, dužan je izmiriti RTV taksu za period za koji je utvrđeno posjedovanje RTV prijemnika.“

## Član 8.

U članu 20 st. (1) i (2) mijenjaju se i glase:

„(1) Svako domaćinstvo dužno je plaćati RTV taksu za samo jedan prijemnik, bez obzira na njihov ukupan broj u domaćinstvu. Punoljetni članovi zajedničkog domaćinstva su suodgovorni obveznici plaćanja RTV takse.

(2) Svako pravno lice, poslovne jedinice pravnog lica koje posluju izvan njegovog sjedišta, samostalne radnje, organizirani subjekti koji obavljaju djelatnost radi stjecanja dobiti, osim navedenih u stavu (3) ovog člana, dužni su plaćati RTV taksu za svaki prijemnik koji posjeduju“.

## Član 9.

(1) U članu 21. stav (2) na kraju teksta tačka se zamjenjuje zarezom i dodaju riječi: „poslovne jedinice pravnog lica, adresu samostalne radnje i organiziranih subjekata koji obavljaju djelatnost radi stjecanja dobit.“

(2) Iza stava (2) dodaju se novi st. (3) i (4) koji glase:

„(3) Pretplatnik je dužan prijaviti svaku promjenu vezanu za obavezu plaćanja RTV takse.

(4) U slučaju smrti pretplatnika dospjele a neizmirene obaveze, na ime RTV takse, obavezan je da plati član porodice koji se nalazi u posjedu imovine pretplatnika.“

(3) Dosadašnji stav (3) postaje stav (5).

## Član 10.

Član 22. mijenja se i glasi:

### „Član 22. (Visina RTV takse)

(1) Najkasnije šest mjeseci nakon stupanja na snagu ovog zakona, Regulatorna agencija će Parlamentarnoj skupštini BiH dostaviti prijedlog o početnom iznosu RTV takse, koji će važiti za petogodišnji period važenja prve Dozvole Sistema.

(2) Najkasnije šest mjeseci prije isteka važenja Dozvole Sistema, Regulatorna agencija razmatra i Parlamentarnoj skupštini BiH dostavlja prijedlog o iznosu RTV takse. Regulatorna agencija neće razmatrati iznos RTV takse više od jedanput svakih pet godina, osim ako Odbor Sistema ne dovede u pitanje iznos RTV takse u skladu sa stavom (3) ovog člana.

(3) Parlamentarna skupština BiH odlučuje o iznosu RTV takse u roku od 30 dana od dana podnošenja prijedloga Regulatorne agencije. Visina RTV takse iz prijedlogne godine važi do stupanja na snagu nove odluke o RTV taksi.

(4) Odbor Sistema može dostaviti Regulatornoj agenciji novi prijedlog iznosa buduće RTV takse, jedanput svakih pet godina, osim u izuzetnoj situaciji koja dovodi u pitanje funkcioniranje Sistema.

(5) Regulatorna agencija zadržava pravo da od Odbora Sistema zatraži sve informacije koje smatra neophodnim u postupku razmatranja iznosa RTV takse.

(6) Visina RTV takse usklađuje se svake godine sa službenom stopom inflacije, koju donosi Agencija za statistiku Bosne i Hercegovine, a odluku o usklađivanju donosi Odbor Sistema.“

### **Član 11.**

U članu 23. iza stava (9) dodaje se novi stav (10) koji glasi:  
„(10) Finansiranje djelatnosti naplate RTV takse redovnim i prinudni putem, vršit će se na osnovu plana troškova emitera, odobrenih od strane generalnih direktora Javnih RTV servisa Bosne i Hercegovine“.

### **Član 12.**

U članu 43. stav (2) riječ: „Fizičkom“ zamjenjuje se riječju: „Pravnom“.  
U stavu (4) riječi: „5.000 KM“, zamjenjuju se riječima: „500 KM“.

### **Član 13.**

Ovaj zakon stupa na snagu osmog dana od dana objavljivanja u „Službenom glasniku BiH“.

PS BiH broj \_\_\_\_\_/11  
\_\_\_\_\_ 2011. godine,  
Sarajevo

**Predsjedavajući  
Predstavničkog doma  
Parlamentarne skupštine BiH**

**Predsjedavajući  
Doma naroda  
Parlamentarne skupštine BiH**

## **O b r a z l o ž e n j e**

### **I Pravni osnov**

Pravni osnov sadržan je u članu IV 4. (a) Ustava Bosne i Hercegovine kojim je utvrđena nadležnost Parlamentarne skupštine Bosne i Hercegovine za donošenje zakona.

### **II Razlog za uvođenje propisa i objašnjenje odabrane politike**

Ministarstvo komunikacija i prometa Bosne i Hercegovine je Programom rada Vijeće ministara Bosne i Hercegovine za 2009. godinu, planiralo izradu Prijedloga zakona o izmjenama i dopunama Zakona o Javnom RTV sistemu Bosne i Hercegovine.

Inicijativa za donošenje ovog propisa dolazi od Komisije za informiranje Predstavničkog doma Parlamentarne skupštine Federacije Bosne i Hercegovine, Javnog RTV servisa Republike Srpske i Javnog RTV servisa Federacije Bosne i Hercegovine.

Odlukom o imenovanju članova Radne grupe za izmjene i dopune Zakona o Javnom RTV sistemu Bosne i Hercegovine, ministra Ministarstva komunikacija i prometa broj: 01-07-07-8-710-8/09 od 13. maja 2009. godine te odlukama o izmjenama i dopunama Odluke o imenovanju članova Radne grupe za izmjene i dopune Zakona o Javnom RTV sistemu Bosne i Hercegovine, broj: 01-07-07-8-710-15/09 od 10. juna 2009. godine i broj: 01-07-8-2830/09 od 18. avgusta 2009. godine, imenovana je Radna grupa čiji su članovi predstavnici slijedećih relevantnih institucija:

- Ministarstvo komunikacija i prometa Bosne i Hercegovine (MKP),
- Regulatorna agencija za komunikacije Bosne i Hercegovine (RAK),
- Ministarstvo saobraćaja i veza Republike Srpske (MSV),
- Ministarstvo prometa i komunikacija Federacije Bosne i Hercegovine (MPK),
- Javni RTV servis Bosne i Hercegovine (BHRT),
- Javni RTV servis Republike Srpske (RTRS),
- Javni RTV servis Federacije Bosne i Hercegovine (RTFBiH).

Na prvom sastanku Radne grupe, održanom 3. juna 2009. godine, Zaključkom je jednoglasno konstatirano, da pored predloženih izmjena treba uzeti u obzir sve inicijative relevantnih institucija u cilju izrade Prijedloga zakona o izmjenama i dopunama Zakona o Javnom RTV sistemu Bosne i Hercegovine, kojim će biti otklonjeni svi pravni i tehnički nedostaci u primjeni zakona.

### III Obrazloženje pojedinih odredbi Zakona

Član 1.

Član 9. stav (1) reguliše dodjelu frekvencija od strane Regulatorne agencije za komunikacije i za to obavezuje javne RTV servise da plaćaju određenu naknadu.

Predloženim izmjenama, ukida se obaveza plaćanja naknade za dodjelu frekvencije, budući da se javni RTV servisi po definiciji finansiraju iz RTV takse i imaju obavezu prema najširoj javnosti. Drugim riječima, obaveza plaćanja korištenja frekvencije „skida se sa leđa pretplatnika“.

S obzirom na tešku finansijsku situaciju u kojoj se nalaze Javni radiotelevizijski servisi Bosne i Hercegovine i u skladu sa zaključcima Predstavničkog doma Parlamentarne skupštine Bosne i Hercegovine sa 41. sjednice, održane 03.12.2008. godine i 76. sjednice, održane 21.04.2010. godine, kojim se podržava provođenje Preporuka Vijeća Evrope broj 96 (10) koja propisuje obavezu nadležnih institucija da pružaju finansijsku podršku javnim servisima, Radna grupa se opredjelila za ovo rješenje.

Član 2.

Član 10. stav (1) sadrži deplasiranu formulaciju koja je imala smisla u trenutku donošenja ovog zakona a čija je primjena – zbog nedovršetka ukupne reforme i nesinhroniziranog donošenja entitetskih zakona o javnim rtv-servisima – postala potpuno nelogična i neprimjenjiva. Iz tog razloga iz navedenog člana brišu se riječi: „Javni RTV servisi neće početi sa radom prije nego što im Regulatorna agencija izda dozvolu“.

Član 3.

Član 15. stav (1) tačka n), kao i u prijednom slučaju, bio je primjenjiv samo u trenutku donošenja Zakona, odnosno u vrijeme dok su trajali prvi, trogodišnji mandati prvih predsjedavajućih upravnim odborima u javnim rtv-servisima. Međutim, sa početkom jednogodišnjih mandata predsjedavajućih navedeni član, stav i tačka predstavljaju logičku grešku. Naime, u tim odrednicama važećeg zakona kaže se da „Predsjednik Odbora Sistema i direktor Korporacije ne mogu biti iz istog konstitutivnog naroda“. Takvo rješenje više nije matematički moguće, jer se generalni direktor bira na pet godina, dok mandat predsjedavajućeg traje godinu dana (samo su prvi predsjedavajući imali mandat od tri godine). Dakle, zakon ne smije stvarati obavezu koju nije moguće provesti. Iz tih razloga briše se tačka „n). Predsjednik Odbora Sistema i direktor Korporacije ne mogu biti iz reda istog konstitutivnog naroda“.

Član 4.

Predlaže se dopuna člana 17. stav (1) u smislu da su preduzetnici (lica koja obavljaju djelatnost radi stjecanja dobiti) koji se organiziraju u obliku samostalnih ugostiteljskih, zanatskih, trgovinskih radnji, odnosno organizirani subjekti koji obavljaju djelatnost radi stjecanja dobiti, a koji posjeduju RTV prijemnik, dužni da plaćaju mjesečnu taksu za posjedovanje tog prijemnika. Time bi se osnažila obaveza svih pravnih lica da plaćaju taksu za posjedovanje RTV prijemnika pod istim uvjetima.



#### Član 5.

Predlaže se brisanje člana 17a. jer je od stupanja na snagu pokazao nedostatak zbog nemogućnosti provođenja. Ovim zakonom se predlaže izmjena u članu 18. dodavanjem stava (6) kojim se propisuje mogućnost donošenja podzakonskog akta koji će definirati pravo fizičkih lica na subvencioniranje RTV takse, način ostvarivanja ove subvencije kao i izvore subvencioniranja, u roku od godinu dana od stupanja na snagu ovog zakona.

#### Član 6.

Članom 18. stav (4) predviđeno je da naplatu RTV takse na području Brčko Distrikta vrši BHRT koji to u praksi ne radi, jer nema organiziranu službu naplate RTV takse. U proteklom periodu, po ovlaštenju BHRT-a, naplatu RTV takse u Brčko Distriktu vršile su naplatne službe RTFBiH i RTRS-a. U praksi se, međutim, dešava da se zbog naznačene zakonske odredbe upućuje prigovor aktivne legitimacije za vođenje sudskih postupaka od strane entitetskih emitera. Zbog toga bi u zakonu trebalo regulirati da BHRT može povjeriti realizaciju tog zadatka entitetskim emiterima kako bi se izbjegle komplikacije prilikom utuživanja neplatiša.

#### Član 7.

Predlaže se izmjena člana 19. stav (1) i stav (2) u smislu da se pretpostavka o posjedovanju odnosi i na sve one subjekte koji su obuhvaćeni predloženom dopunom člana 17. stav (1). Promjena stava (1) u ovom članu iziskuje promjenu stava (2).

Novi stav (4) definira obavezu fizičkog lica da izmiri RTV taksu za period za koji je bilo oslobođeno ukoliko se utvrdi da u međuvremenu, nije prijavilo nabavku novog radijskog ili televizijskog aparata, po zakonom propisanoj proceduri.

#### Član 8.

Član 20. stav (1) treba preformulirati jer je iskustvo pokazalo da postoje «domaćinstva» u kojima «domaćin», na koga glasi račun za plaćanje RTV takse, nema novčana primanja, a članovi domaćinstva imaju.

U članu 20. stav (2) je dodato da su poslovne jedinice pravnog lica koje posluju izvan njegovog sjedišta, samostalne radnje, organizirani subjekti koji obavljaju djelatnost radi stjecanja dobiti, dužne da plaćaju RTV taksu za svaki prijemnik koji posjeduju.

#### Član 9.

U članu 21. je dopunjen stav (2), te dodati novi stavovi (3) i (4), s tim da postojeći stav (3) postaje stav (5), kako bi ovaj član bio konzistentan sa prijetodnim odredbama. Stav (1) se ne mijenja.

#### Član 10.

U članu 22. regulira se pitanje utvrđivanja visine RTV takse i ovaj član se mijenja u cjelosti.

U stavu (1) toga člana se definira princip petogodišnjeg utvrđivanja visine RTV takse koliko traje Dozvola Sistema. U tom stavu se kaže da najkasnije šest mjeseci od dana stupanja na snagu ovog zakona, RAK razmatra i Parlamentarnoj skupštini

Bosne i Hercegovine dostavlja prijedlog iznosa RTV takse. Utvrđivanje startne visine RTV takse, bi trebalo vezivati za izdavanja prve Dozvole Sistema.

U stavovima (1) i (3) člana 22. dopušta se, izuzetno, i mogućnost vanrednog povećanja visine RTV takse, izvan petogodišnjeg zakonskog ciklusa.

U slučaju pokretanja redovne ili vanredne inicijative od strane Odbora Sistema za povećanje visine RTV takse, RAK je dužan prezentirati svoje mišljenje Parlamentarnoj skupštini BiH. Definiran je rok u kome to RAK mora učiniti, iako takav rok postoji u slučaju Parlamentarne skupštine BiH koja odlučuje u roku od 30 dana o iznosu RTV takse od dana podnošenja prijedloga RAK-a. Utvrđivanjem preciznih rokova za sve činioce u lancu povećanja RTV takse otklanjaju se nejasnoće koje mogu imati negativne implikacije na sistem finansiranja i finansijskog planiranja javnog RTV sistema Bosne i Hercegovine.

Član 11.

Član 23. pored ostalog regulira način uplate i način raspodjele RTV takse na jedinstveni račun. Ovim članom treba dodatno razriješiti i problem uplate troškova sudskog utuženja neplatiša koje vrše entitetski emiteri, kao i način alimentiranja troškova inkaso službi, što se pokazalo kao ozbiljan problem u dosadašnjoj praksi. To je moguće postići dodavanjem novog stava (10).

Član 12.

U kaznenim odredbama, član 43., otklanja se tehnička greška pa se u stavu (2) riječ „Fizičkom“ zamjenjuje riječju „Pravnom“, a u stavu (4) riječi: „5.000 KM“ zamijeniti riječima „500 KM“.

#### **IV Obrazloženje finansijskih sredstava za provođenje Zakona**

Za provođenje ovog zakona nije potrebno osigurati sredstva u Budžetu institucija Bosne i Hercegovine.

#### **V Finansijski učinci Zakona**

Donošenjem ovog zakona javni RTV servisi u Bosni i Hercegovini bi se oslobodili plaćanja državnog doprinosa za korištenje radiofrekventnog spektra.

Ukoliko bi se državni doprinos naplaćivao od tri Javna RTV servisa u Bosni i Hercegovini, u Budžet bi se, na godišnjem nivou, uplaćivao ukupan neto iznos od 485.000 KM.

Napominjemo da ova sredstva do sada nisu ni bila uplaćivana u Budžet institucija Bosne i Hercegovine i međunarodnih obaveza Bosne i Hercegovine.

Podsjećamo da je Vijeće ministara Bosne i Hercegovine usvojilo Odluku o davanju saglasnosti na nenaplatu naknade za dozvolu i državnog doprinosa do izdavanja jedinstvene dozvole Javnog radiotelevizijskog sistema u Bosni i Hercegovini, broj 165/07 („Službeni glasnik BiH“, broj 3/2008) kojom se dala saglasnost Regulatornoj agenciji za komunikacije da ne naplaćuje naknade za izdate dozvole i državni

doprinos za korištenje radiofrekventnog spektra javnim RTV servisima do izdavanja jedinstvene dozvole Javnog radiotelevizijskog sistema u Bosni i Hercegovini.

Također u proceduri usvajanja je i Prijedlog odluke o oslobađanju javnih radiotelevizijskih servisa u Bosni i Hercegovini od obaveze plaćanja državnog doprinosa za korištenje radiofrekventnog spektra za vrijeme važenja prve dozvole. Ovo je jedan od načina državne pomoći javnim RTV servisima Bosne i Hercegovine koji su u fazi finansijske konsolidacije i reforme sktora javnog emitiranja Bosne i Hercegovine, koja je definirana kao kratkoročni prioritet u Sporazumu o stabilizaciji i pridruživanju Bosne i Hercegovine EU.

Međutim, ovim zakonom bi se javni radiotelevizijski servisi trajno oslobodili od plaćanja navedenog državnog doprinosa za radiofrekventni spektar.

S druge strane, ovim zakonom se nastoji poboljšati naplata RTV takse, na način da svi punoljetni članovi zajedničkog domaćinstva postanu suodgovorni obveznici plaćanja RTV takse, jer je iskustvo pokazalo da postoje «domaćinstva» u kojima «domaćin», na koga glasi račun za plaćanje RTV takse, nema novčana primanja, a članovi domaćinstva imaju.

Također, članom 8. stav (2) Zakona je obaveza plaćanja RTV takse, za svaki prijemnik koji posjeduju, uvedena i za poslovne jedinice pravnog lica koje posluju izvan njegovog sjedišta, samostalne radnje te organizirane subjekte koji obavljaju djelatnost radi stjecanja dobiti.

Na ovaj način bi se pospiješilo punjenje budžeta javnih RTV servisa, čiji je osnovni prihod isključivo RTV taksa i sredstva od marketinga.

## **PREGLED ODREDBA**

**Zakona o javnom radiotelevizijskom sistemu Bosne i Hercegovine**  
(„Službeni glasnik BiH“, br. 78/05, 35/09 i 32/10) koje se mijenjaju i dopunjuju

### **Član 9. ( Frekvencije)**

- (1) Regulatorna agencija dodjeljuje frekvencije javnim RTV servisima za jednu TV i dvije radiostanice za cijelu teritoriju Bosne i Hercegovine, dvije TV stanice i dvije radiostanice za područje određenog entiteta po cijenama koje utvrdi Regulatorna agencija. Dodijeljene frekvencije moraju biti dovoljne da bi se osiguralo da što veći broj stanovnika Bosne i Hercegovine može imati nesmetan prijem programa BHRT, da što veći broj stanovnika u Federaciji Bosne i Hercegovine može imati nesmetan prijem programa RTFBiH, te da što veći broj stanovnika u Republici Srpskoj može imati nesmetan prijem programa RTRS-a, u mjeri u kojoj je to praktično izvodljivo.
- (2) Vijeće ministara BiH ima pravo pokrenuti proceduru za osnivanje novog RTV kanala unutar Sistema nakon konsultacija s Regulatornom agencijom i Odborom Sistema. Vijeće ministara BiH razmotrit će inicijative nakon izrade nezavisne, transparentne i opsežne analize koja obuhvata program, spektar, tehničke, finansijske i druge informacije kojima se opravdava osnivanje novog kanala.

### **Član 10. (Dozvola)**

- (1) Regulatorna agencija izdat će dozvole kojima će omogućiti javnim RTV servisima da djeluju u skladu s ovim zakonom. Javni RTV servisi neće početi raditi prije nego što im Regulatorna agencija izda dozvolu.
- (2) Regulatorna agencija utvrđuje posebne i komplementarne dozvole za javne RTV servise u skladu s članom 9., koje čine dozvolu Sistema (u daljnjem tekstu: za Sistem "dozvola Sistema", za pojedinačne javne RTV servise "dozvola").
- (3) Svaka dozvola Sistema izdaje se na period od pet godina i podliježe svim sankcijama za kršenje uslova, pojedinačnih dozvola i dozvole Sistema od javnih RTV servisa.
- (4) Dozvolom Sistema utvrđuje se komplementarni set obaveza za tri javna RTV servisa i obuhvata sljedeće:
  - a) pokrivenost prijenosom i frekventne opsege za javne RTV servise;
  - b) konkretne programske okvire za svaku uslugu koju pružaju javni RTV servisi, koji su neophodni da bi se ispoštovali programski principi;
  - c) rokove za neophodne programske planove i druge izvještaje i informacije koje Regulatorna agencija može tražiti;
  - d) podatke o dodatnim kodeksima i smjernicama Regulatorne agencije, koje se konkretno primjenjuju za javne RTV servise;

- e) dozvola Sistema, također, precizira sankcije za kršenje uslova iz dozvole Sistema.

**Član 15.**  
**(Generalni direktor)**

(1) Nadležnosti generalnog direktora su sljedeće:

- a) rukovodi radom Korporacije;
  - b) odgovara za zakonitost rada;
  - c) odgovara za provođenje odluka Odbora Sistema;
  - d) odgovara za razvojnu strategiju i politiku poslovanja;
  - e) uspostavlja saradnju i koordinaciju s generalnim direktorima javnih RTV servisa;
  - f) odobrava rashode, dispozicije ili investicije u skladu sa Statutom;
  - g) zaključuje sporazume i ugovore u skladu sa Statutom;
  - h) osigurava izradu godišnjeg finansijskog plana i budžeta u saradnji s generalnim direktorima javnih RTV servisa;
  - i) zapošljava i rukovodi Poslovnim odborom u skladu sa Statutom i ostalim općim aktima Korporacije;
  - j) odgovara za ispunjenje važećih uslova "dozvole Sistema";
  - k) dogovara godišnju poslovnu reviziju Korporacije od nezavisne revizorske institucije;
  - l) generalnog direktora imenuje Odbor Sistema na osnovu javnog konkursa na način određen članom 8. ovog zakona;
  - lj) mandat generalnog direktora traje pet godina i može se obnoviti samo jednom;
  - m) generalni direktor mora biti lice koje je državljanin BiH i ispunjava uslove predviđene Statutom;
  - n) predsjednik Odbora Sistema i direktor Korporacije ne mogu biti iz istog konstitutivnog naroda;
  - nj) generalni direktor utvrdit će organizaciju Korporacije, kojom se omogućava efikasno izvršenje funkcije i odgovornosti Korporacije, kako je utvrđeno ovim zakonom.
- (2) Generalni direktor ne može obavljati nikakvu izvršnu, zakonodavnu ili sudsku funkciju ni na jednom nivou vlasti u Bosni i Hercegovini i ne može biti vlasnik, odnosno suvlasnik preduzeća koja obavljaju djelatnost radio ili televizijskog emitiranja, niti na drugi način biti angažiran u nekoj djelatnosti koja može dovesti do sukoba interesa.

(3) Ako u postupku zapošljavanja u Korporaciji dva ili više kandidata podjednako ispunjavaju tražene uslove, generalni direktor dat će prednost kandidatu manje zastupljenog spola. Na poslovima istog stepena složenosti spolovi treba da budu ravnopravno zastupljeni.

#### **Član 17.**

##### **(Taksa za posjedovanje prijemnika)**

(1) Svako domaćinstvo i pravno lice na teritoriji Bosne i Hercegovine koji posjeduju radio ili televizijski prijemnik dužni su plaćati mjesečnu taksu za posjedovanje tog prijemnika (u daljnjem tekstu: RTV taksa) pod uslovima određenim ovim zakonom.

(2) Prihod od RTV takse može se koristiti samo za finansiranje osnovne djelatnosti javnih RTV servisa.

(3) Prihod od RTV takse ne podliježe poreskim obavezama.

#### **Član 17a.**

##### **(Oslobađanje od obaveze plaćanja RTV takse za slijepa i gluha lica)**

(1) Od obaveze plaćanja RTV takse iz člana 17. stav (1) ovog zakona, oslobađaju se vlasnici prijemnika koji su trajno izgubili vid ili sluh i žive sami u domaćinstvu ili sa starateljem.

(2) Pravo na oslobađanje od obaveze plaćanja RTV takse iz člana 17. stav (1) ovog zakona ostvaruje se na osnovu potvrde ustanove nadležne za poslove penzionog i invalidskog osiguranja.

(3) Vijeće ministara BH dužno je u budžetu institucija Bosne i Hercegovine osigurati sredstva u visini iznosa umanjениh prihoda Javnog RTV sistema BiH nastalih zbog oslobađanja plaćanja RTV takse vlasnika prijemnika iz stava (1) ovog člana. Sredstva za naknadu prihoda Javnom RTV sistemu BiH uplaćivat će se na jedinstveni račun u skladu s članom 23. stav (1) ovog zakona."

#### **Član 18.**

##### **(Način naplate)**

(1) Način naplate RTV takse određuje i uspostavlja Odbor Sistema.

(2) Organizacione jedinice zadužene za taksu sva tri javna RTV servisa prate naplatu RTV takse i o tome obavještavaju Odbor Sistema.

(3) Naplatu RTV takse mogu vršiti javni RTV servisi putem vlastitih službi ili taj posao na ugovornoj osnovi povjeriti drugim pravnim licima (javna preduzeća, agencije i sl.).

(4) BHRT vrši naplatu RTV takse na području Brčko Distrikta BiH, RTFBiH na području Federacije Bosne i Hercegovine i RTRS na području Republike Srpske. Naplaćena RTV taksa raspoređuje se u skladu s članom 23. ovog zakona.

(5) U svim ugovorima, koji se odnose na prikupljanje RTV takse iz stava 3. ovog člana, svaki javni RTV servis bit će ugovorna strana.

**Član 19.**  
**(Pretpostavka o posjedovanju)**

(1) Smatra se da jedno lice u svakom domaćinstvu i svako registrirano pravno lice u Bosni i Hercegovini imaju radio ili televizijski prijemnik.

(2) Pretpostavka iz stava (1) ovog člana može se osporiti pismenom izjavom nosioca domaćinstva, odnosno lica ovlaštenog za zastupanje pravnog lica.

(3) Pismena izjava dostavlja se javnim RTV servisima i istovremeno podrazumijeva pristanak da ovlašteni predstavnik javnih servisa izvrši neposrednu kontrolu tačnosti navoda iz izjave. U slučaju nedozvoljavanja neposredne kontrole, pismena izjava ne proizvodi pravno djelovanje.

**Član 20.**  
**(Broj prijemnika)**

(1) Svako domaćinstvo dužno je plaćati RTV taksu za samo jedan prijemnik bez obzira na njihov ukupan broj u domaćinstvu. Samo jedan član domaćinstva može biti evidentiran kao obaveznik plaćanja RTV takse.

(2) Svako pravno lice, osim onih navedenih u stavu 3. ovog člana, dužno je plaćati RTV taksu za svaki prijemnik koji posjeduje.

(3) Javne zdravstvene institucije, javne obrazovne institucije, institucije za socijalnu pomoć, radiotelevizijske stanice i pravna lica koja se bave proizvodnjom, servisiranjem, instalacijom, prodajom ili iznajmljivanjem radio ili televizijskih prijemnika plaćaju jednu taksu po instituciji, prodavnici, odnosno poslovnici ili ispostavi.

**Član 21.**  
**(Obaveza prijavljivanja prijemnika)**

(1) Svako domaćinstvo ili pravno lice dužni su javnom RTV servisu prijaviti nabavku radio ili televizijskog prijemnika, u roku od 30 dana, ako se tom nabavkom za njega stvara obaveza plaćanja RTV takse utvrđena ovim zakonom.

(2) Svaki pretplatnik dužan je prijaviti javnom RTV servisu promjenu adrese stanovanja, odnosno sjedišta pravnog lica.

(3) Obaveza plaćanja RTV takse nastaje od prvog dana narednog mjeseca od dana nabavke radio ili televizijskog prijemnika.

**Član 22.**  
**(Visina RTV takse)**

- (1) Najkasnije šest mjeseci prije datuma isteka važeće dozvole Sistema Regulatorna agencija razmatra i Parlamentarnoj skupštini BiH dostavlja prijedlog o iznosu RTV takse. Regulatorna agencija neće razmatrati iznos RTV takse više od jedanput svakih pet godina, osim ako Odbor Sistema ne dovede u pitanje iznos RTV takse u skladu sa stavom 3. ovog člana.
- (2) Parlamentarna skupština BiH odlučuje o iznosu RTV takse u roku od 30 dana od dana podnošenja prijedloga Regulatorne agencije. Visina RTV takse iz prethodne godine važi do stupanja na snagu nove odluke o RTV taksi.
- (3) Odbor Sistema može dostaviti Regulatornoj agenciji novi prijedlog iznosa buduće RTV takse. Takav prijedlog može dostaviti jedanput svakih pet godina, osim u izuzetnoj situaciji koja dovodi u pitanje funkcioniranje Sistema.
- (4) Visina RTV takse bit će usklađena svake godine sa službenom stopom inflacije u Bosni i Hercegovini.

**Član 23.**  
**(Raspodjela RTV takse)**

- (1) RTV taksa u Bosni i Hercegovini naplaćuje se na području entiteta i Brčko Distrikta BiH, s tim što se uplata vrši na jedinstveni račun.
- (2) Ukupni netodohodak od prodaje marketinškog oglašavanja također se uplaćuje na jedinstveni račun.
- (3) Članovi Odbora Sistema su povjerioci i izvršioци navedenog jedinstvenog računa i odgovorni su za nadzor nad postupkom naplate.
- (4) RTFBiH pripada 25% netoprihoda od marketinškog oglašavanja i 25% od ukupnog iznosa RTV takse naplaćene na teritoriji Bosne i Hercegovine.
- (5) RTRS pripada 25% netoprihoda od marketinškog oglašavanja i 25% od ukupnog iznosa RTV takse naplaćene na teritoriji Bosne i Hercegovine.
- (6) BHRT pripada 50% netoprihoda od marketinškog oglašavanja i 50% od ukupnog iznosa RTV takse naplaćene na teritoriji Bosne i Hercegovine.
- (7) Ovi omjeri raspodjele primjenjuju se bez obzira na način prikupljanja.
- (8) Organizacije koje naplaćuju RTV taksu i vrše marketinško oglašavanje u ime javnih RTV servisa dužne su uplatiti naplaćeni iznos RTV takse i netoprihod od marketinškog oglašavanja na jedinstveni račun bez odgađanja.
- (9) Raspodjela sredstava javnim RTV servisima s jedinstvenog računa vršit će se odmah.



**Član 43.**  
**(Kaznene odredbe)**

- (1) Fizičkom licu koje ne ispuni obaveze propisane st.(1) i (2) člana 21. ovog zakona ili koje da lažnu izjavu, koristeći se pravom iz člana 19. stav (2) ovog zakona, bit će za prekršaj izrečena novčana kazna u iznosu od 100 KM do 300 KM.
- (2) Fizičkom licu koje ne ispuni obaveze propisane st.(1) i (2) člana 21. ovog zakona ili koje da lažnu izjavu, koristeći se pravom iz člana 19. stav (2) ovog zakona, bit će za prekršaj izrečena novčana kazna u iznosu od 1.000 KM do 3.000 KM, a odgovornom licu u tom pravnom licu novčana kazna u iznosu od 200 KM do 500 KM.
- (3) Fizičkom licu koje ne ispuni obavezu plaćanja navedenu u članu 20. stav (1) ovog zakona bit će, u prekršajnom postupku, izrečena novčana kazna u iznosu od 100 KM do 300 KM.
- (4) Pravnom licu koje ne ispuni obavezu plaćanja navedenu u članu 20. stav (2) ovog zakona u prekršajnom postupku bit će izrečena novčana kazna u iznosu od 1.000 KM do 3.000 KM, a odgovornom licu u tom pravnom licu novčana kazna u iznosu od 200 KM do 5.000 KM.